

Vesiculæ *verrucosæ* terminales, prioribus glabris arcte supra dichotomiam ultimam approximatae, apice acuto, sæpius bicorni: superna medietate verrucosæ, inferna vero glabræ.

Color eleganter rubens.

CONFERVA.

52. CONFERVA fascicularis, capillamentis geniculatis simplicissimis brevissimis.

Habitat in mari Germanico copiose in Fuco spirali Fl. Sv. 1003, ex Doggens bank extracto.

Capillamenta tenuissima vix nudo oculo distingvibilia, simplicissima, brevia, fasciculatim innata verrucis frondium Fuci prædicti; optima lente considerata apparent geniculata (aliis microscopiis minoribus vix observantur genicula), geniculis brevissimis; tota vix unguem dimidium vel integrum longitudine attingit.

Color in antiquioribus viridis, in junioribus Confervis albidus.

Fructificationes copiosæ, pedunculatæ, ex geniculis solitariæ; pedunculo geniculis fere duplo longiore, tenuissimo: angulo recto patente.

Calyx turbinatus s. obovatus vel hemisphæricus, omnino pellucidus, tenerrimus ore integro vel integerrimo, intus cavus.

Corpusculum (an semen)? globosum, subopacum, intra calycem, in aliis in fundo calycis, in aliis in ore, in aliis totam calycem opplebant, aliis calycibus illis carentibus.

